

ՏԱՎՈՒՇ ՄԵՂԻԱՅԻ ԽՄԲԱԳՐԱԿԱՆ ՈՒՂԵՑՈՒՅՑ

Այս փաստաթուղթը սահմանում է Տավուշ Մեղիայի խմբագրական գործունեության հիմնական սկզբունքներն ու գործելակարգերը: Այն ծառայում է որպես ներքին կանոնագիր՝ լրատվամիջոցի ամբողջ խմբագրական անձնակազմի համար՝ ուղղված անկախ, հավաստի, բազմակարծիք և հանրային շահը սպասարկող լրագրության ապահովմանը:

Մեր առաքելությունը

Տավուշ Մեղիան տրամադրում է վստահելի, հավաստի և օգտակար տեղեկատվություն՝ նպաստելով Տավուշի մարզի հանրային իրազեկվածությանը, ժողովրդավարության ամրապնդմանը և մարդու իրավունքների պաշտպանությանը: Մենք ձգտում ենք հավասարակշռված, բազմակողմանի ու փաստահեն լրագրության՝ մեր համայնքին օգտակար լինելու գիտակցությամբ:

Ուղեցույցը տարածվում է խմբագրակազմի և համագործակցող գործընկերների վրա:

1. Ընդհանուր պրակտիկա

ա) Անանուն հրապարակումներ

Տավուշ Մեղիայի հոդվածները կարող են հրապարակվել անանուն կամ կեղծանունով միայն բացառիկ դեպքերում՝ երբ հեղինակի անվտանգությունը, անձնական տվյալները կամ աշխատանքային պայմանները կարող են վտանգվել: Այդ դրոշումը կայացնում է գլխավոր խմբագիրը: Նման դեպքերում ընթերցողներին տեղեկացվում է հրապարակման անանուն լինելու մասին:

բ) Վճարներ խմբագրական նյութերի համար

Մենք սկզբունքորեն չենք վճարում աղբյուրներին՝ բացառությամբ ֆրիլանս լրագրողների, որոնց համար դա հաստատվում է խմբագրական մակարդակով: Հանրային պաշտոնյաների, իշխանության ներկայացուցիչների կամ պետական ծառայողների հետ աշխատելիս խստորեն պահպանում ենք կոռուպցիոն ռիսկերից խուսափելու սկզբունքը:

գ) Ֆրիլանսեր անձնակազմ

Տավուշ Մեդիան հավատարիմ է ֆրիլանս լրագրողների հետ արդար և թափանցիկ համագործակցության սկզբունքներին՝ առաջնորդվելով միջազգային լավագույն փորձով:

դ) Գաղտնիություն

Տավուշ Մեդիայի ղեկավարներն ու խմբագիրները պարտավոր են պաշտպանել աշխատակիցների և աղբյուրների անձնական տվյալները՝ բացառությամբ այն դեպքերի, երբ դրանց տրամադրումը պահանջվում է օրենքով կամ խմբագրական որոշմամբ:

ե) Հեղինակային իրավունք

Մենք հարգում ենք հեղինակային իրավունքը: Լրագրողները պետք է ստանան համապատասխան թույլտվություն երրորդ անձանց պատկանող նյութերը (լուսանկարներ, տեքստեր, գրաֆիկա և այլն) օգտագործելուց առաջ՝ բացառությամբ, երբ այն օգտագործվում է ակնհայտորեն արդար և օրենքով թույլատրելի ձևով՝ տեղեկացնելու կամ վերլուծելու նպատակով:

գ) Սխալներ

Մեր քաղաքականությունն է հնարավորինս արագ շտկել էական սխալները: Բոլոր ընթերցողների բողոքները գրանցվում են և քննարկվում խմբագրի հետ՝ շտկման կամ հերքման հրապարակման նպատակով:

է) Իրավական հարցեր

Լրագրողները պետք է տեղեկացված լինեն գրպարտության, վիրավորանքի, անձնական կյանքի խախտման և հանրային շահի սահմանների մասին՝ իրավական պատասխանատվությունից խուսափելու համար: Անորոշության դեպքում պարտադիր է խորհրդակցել իրավաբանի կամ խմբագրի հետ:

ը) Անձնական կյանքի պաշտպանություն

Մենք հարգում ենք մարդկանց անձնական կյանքը: Միջամտությունը կարող է արդարացվել միայն հանրային հստակ անհրաժեշտության պարագայում՝ խմբագրական հաստատմամբ:

թ) Համագործակցություն հանրության հետ

Հարցումներին պատասխանում ենք քաղաքավարի ու ժամանակին՝ բոլոր հասանելի հարթակներով: Սոցցանցերում պահպանում ենք լրագրողական էթիկայի սահմանները և խուսափում ենք կողմնակալ ու ապատեղեկատվական արտահայտություններից:

2. Խմբագրական կանոններ

ա) Ճշգրտություն և ստուգում

Տավուշ Մեդիայի լրագրողները պարտավոր են ստուգել բոլոր փաստերն ու տեղեկությունները՝ նախքան հրապարակելը: Մենք վստահում ենք միայն հուսալի աղբյուրներին և նշում ենք, եթե որևէ տեղեկություն հնարավոր չի եղել ստուգել:

բ) Անանուն մեջբերումներ

Անանուն աղբյուրներ օգտագործվում են միայն այն դեպքում, երբ այլ կերպ հնարավոր չէ ստանալ հանրային կարևորություն ունեցող տեղեկատվություն: Մենք երբեք չենք օգտագործում անանուն աղբյուրներ՝ որևէ մեկի դեմ չհիմնավորված մեղադրանքներ ներկայացնելու համար:

գ) Տեղեկատվության աղբյուրներ

Մենք պարտավոր ենք պահպանել մեզ տեղեկություն տրամադրած անձանց գաղտնիությունը՝ հատկապես, եթե նրանք կարող են վտանգի ենթարկվել: Միևնույն ժամանակ՝ անհրաժեշտության դեպքում, պետք է ձգտել հնարավորինս բացահայտել աղբյուրի բնույթը: Աղբյուրից վերցված նյութը՝ անկախ բովանդակության տեսակից, պետք է ուղեկցվի հղմամբ:

դ) Երեխաների մասին հաղորդումներ

Մինչև 18 տարեկան երեխաների վերաբերյալ նյութերը պատրաստվում են հատուկ զգուշությամբ: Լրագրողները պարտավոր են ստանալ ծնողի կամ խնամակալի համաձայնությունը՝ երեխային լուսաբանելուց առաջ:

ե) Ուղղակի մեջբերումներ

Մեջբերումները պետք է փոխանցվեն հնարավորինս հստակ ու առանց իմաստի փոփոխության: Մանր խմբագրումներ կարելի է կատարել միայն հստակեցման կամ ձևի բարելավման նպատակով, առանց բովանդակության աղավաղման:

զ) Հանրային աջակցություն

Լրագրողները չպետք է որևէ պարագայում համաձայնեն գովազդել հարցազրույց տվող անձանց կամ կառույցների՝ հասանելիություն ստանալու դիմաց: Հնարավոր է միայն այն տեղեկության ներառում, որը իրականում օգտակար է հանրության համար և խմբագրական նյութի մաս է:

ե) Արդարություն և բառապաշարի օգտագործում

Տավուշ Մեդիան կարևորում է բոլոր կողմերի ձայնի հավասար ներկայացում, հատկապես այն անձանց կամ կառույցների, որոնք քննադատության թիրախում են: Մենք պարտավորվում ենք ապահովել հավասարակշռված և փաստարկված ներկայացում՝ ընթերցողին տրամադրելով ամբողջական պատկեր: Մեր լեզուն պետք է լինի ներառական, հարգալից և չեզոք: Խուսափում ենք ցանկացած արտահայտությունից, որն ունի վիրավորական, խտրական կամ բևեռացնող բնույթ, անկախ նրանից՝ այն ուղղված է անհատի, խմբի կամ համայնքի դեմ:

ը) Ապրումակցում

Վիշտ ապրող կամ ծանր կորուստ ունեցող անձանց լուսաբանելիս ցուցաբերում ենք լրացուցիչ զգայունություն: Նրանց հետ աշխատելիս անհրաժեշտ է թույլտվություն և հարգալից մոտեցում:

թ) Նկարներ, պատկերներ և տեսանյութեր

Տեսողական բովանդակությունը չպետք է մանիպուլյացվել այնպես, որ փոխի դրա իրական իմաստը: Եթե որևէ բան մոնտաժվել է, դա պետք է նշվի:

3. Շահերի բախում

Տավուշ Մեդիան գործում է որպես անկախ լրատվամիջոց՝ հասարակական վստահությունը որպես գերակայություն դիտարկելով: Այս բաժինը սահմանում է, թե ինչպես պետք է խուսափել իրավիճակներից, երբ լրագրողի անձնական շահերը կարող են հակասել լրատվամիջոցի շահերին կամ վնասել նրա վստահելիությանը:

ա) Նվերներ և վճարներ

Աշխատակազմի անդամները չեն ընդունում որևէ նվեր, գումար կամ ծառայություն, որն ուղղակի կամ անուղղակի կարող է ազդեցություն ունենալ նրանց անկախության կամ նյութի բովանդակության վրա: Նման առաջարկների դեպքում պետք է անհապաղ տեղեկացնել խմբագրին:

Լրագրողները պետք է բացահայտեն, եթե որևէ երրորդ կողմ վճարել է իրենց ճանապարհորդության, կեցության կամ սննդի համար: Այդ դեպքերում որոշումը՝ հրապարակել արդյոք նյութը, ընդունվում է խմբագրի հետ խորհրդակցությամբ:

բ) Առևտրային շահեր

Լրագրողները և խմբագիրները չպետք է գովազդեն ապրանք կամ ծառայություն՝ առանց խմբագրության նախապես տրված թույլտվության: Տավուշ Մեդիան երբեք չի զբաղվում պատվերով գովազդային բովանդակության ստեղծմամբ՝ որպես խմբագրական նյութ:

գ) Արտաքին ներգրավվածություն

Տավուշ Մեդիայի աշխատակիցները կարող են ունենալ աշխատանքից դուրս հետաքրքրություններ կամ ներգրավվածություն, սակայն դրանք չպետք է հակասեն լրատվամիջոցի անկախությանը, բարեխղճությանը կամ վնասեն հանրային վստահությանը:

Տավուշ Մեդիայի լրագրողը կամ խմբագրակազմի որևէ անդամ չի կարող լինել որևէ քաղաքական կուսակցության անդամ կամ ներգրավված քաղաքական կուսակցական գործունեության մեջ: Սա ներառում է՝

- անդամակցություն կուսակցության,
- քարոզարշավին մասնակցություն,
- հանրային աջակցություն կուսակցական թեկնածուին կամ ուժին,
- կուսակցական միջոցառումների վարում կամ կազմակերպում:

Այս սահմանափակումը նպատակ ունի պաշտպանել լրատվամիջոցի խմբագրական չեզոքությունը և կանխել կողմնակալության ընկալումը:

Եթե աշխատակիցը պլանավորում է ներգրավվել որևէ այլ հասարակական կամ մասնագիտական կառույցում (օրինակ՝ ՀԿ, ակումբ, բիզնես նախաձեռնություն), որը կարող է ընկալվել որպես շահերի բախում, նա պարտավոր է նախապես տեղեկացնել գլխավոր խմբագրին:

դ) Շահերի բացահայտում

Եթե լրագրողը գրում է նյութ այն թեմայի շուրջ, որի հետ ունի անձնական կապ (ընտանիք, ընկերներ, նախորդ զբաղվածություն և այլն), դա պետք է բացահայտվի: Ֆրիլանս աշխատակիցներն այս պահանջին ենթակա են նույն չափով, ինչ ներքին անձնակազմը:

ե) Կորպորատիվ շահերի բացահայտում

Եթե Տավուշ Մեդիան կապ ունի այլ կազմակերպության հետ՝ մասնաբաժնի, գործընկերության կամ դրամաշնորհի տեսքով, այն պետք է բացահայտվի՝ կապված նյութերում: Աշխատակազմը պետք է ծանոթ լինի այդ կապերին:

Այս պահին Տավուշ Մեդիան անկախ է և չունի այլ լրատվամիջոցների կամ ընկերությունների հետ կապ, որոնք կարող են ազդել խմբագրական որոշումների վրա:

զ) Ֆինանսական շահեր

Տավուշ Մեդիայի լրագրողները չպետք է օգտագործեն ներքին տեղեկատվություն՝ անձնական կամ մտերիմների ֆինանսական շահ ստանալու նպատակով:

4. Մասնագիտական զարգացում

Տավուշ Մեդիան կարևորում և խրախուսում է աշխատակիցների շարունակական կրթությունն ու մասնագիտական աճը: Մենք հավատում ենք, որ բարձր որակի լրագրությունը հնարավոր է միայն այն դեպքում, երբ լրագրողը զարգացնում է իր հմտությունները և ընդլայնում գիտելիքները:

Լրատվամիջոցը խրախուսում է մասնակցությունը տեղական և միջազգային դասընթացների, սեմինարների, մեդիա ճամբարների և վերապատրաստման ծրագրերի՝ նոր գործիքներ, մեթոդներ ու մոտեցումներ ձեռք բերելու նպատակով:

Տավուշ Մեղիան հնարավորության սահմաններում աջակցում է նման նախաձեռնություններին:

Տավուշ Մեղիայի խմբագրական ուղեցույցը ենթակա է պարբերաբար վերանայման՝ նոր իրավական, տեխնոլոգիական և մեղիա զարգացումներին համապատասխանեցնելու նպատակով: Եթե լրագրողը կամ խմբագիրն ունի որևէ էթիկական կասկած կամ հարց, պարտադիր է դիմել գլխավոր խմբագրին: